

---

# त्योल

---

अर्जन देव मजबूर



---


**Source: 'tyól' by Arjan Dev Majboor. Year of publication: 1995**

**Transformed into Standardised Devanagari-Kashmiri by**

**M.K.Raina.**

**Work completed on 21.02.2005.**

---



शुलेंदर, नील नाग  
तु कुलि आलमुक्यन गुलन हुंदि नावु

## त्योल

मे बोवुम सीर च्यतु किस राजु होंजस  
 पनुन्य रथ यादु वेत्रुक्य सुत्य दितिमस  
 मुकामा अख जुवा तस याद पॉविथ  
 खसुन आकाश वोनुमस तेज वुफ दिथ  
 स्यटाह पोरमस तु कोरमस ज़ारु पारय  
 वुनल आसी तु पॅक्यजे वारु वारय  
 करुन्य नो छय न कुनिची द्यारु कारय  
 सु आलम म्योन अज वुछज्यन दुबारय

सुली शोकस ओनुम व्यस्तार द्युतुमस  
 विहल सोचस तिहल रफतार द्युतुमस  
 पॅतिम वाकाथ तौरिथ मालि माले  
 मे वोनुमस तार लॅग्यनय बालु ताले  
 ज़मानुक्य बॉव्यमस हालाथ सॉरी  
 दिलुक्य मुच्चरिथ मे थॅव्यमस सॉर्य तॉरी  
 व्यच्चारन हँद्य सन्यर छौरिथ बराबर  
 मे वोनुमस छंडतख अज गाशि आगर

ओबुर आसी कोहन वथ वुछजि वारय  
 करामाथा च्चु हावुम छुय नु चारय  
 खॅसिथ बालन नयन येलि छालु मारख  
 च्चु विगने काँसि पथ यिनु व्वंदु हारख  
 बुनफ्शी पोशि रादन व्यूर तुलिजे  
 वनन हुंद नूर अंदरिमि कायि मॅल्यजे  
 तु लोलय सुत्य सोचुक बोस बॅर्यजे  
 छॅतिस शीनस पयापय मीठ्य वॅर्यजे

वॅरिथ कुनि नागु रब्बजे प्यठ करारा

च नज़रव सुत्यु लॅब्ज्जे साफ तारा  
 अँच्चिथ मर्गे लंजे कुनि रॉयलस प्यठ  
 खस्यव ख्राशव अंदुर्य कुनि छॉर्यजे वथ  
 पॅहॉडी आरु करनय ज़ारु पारय  
 च दॅप्यज़्यख अज़ हसॉ छम लारु लारय  
 छे कॉमा तिछ किहीं यथ छुम नु चारय  
 वॅरिव ऑही लग्यम युथ कामि तारय

अगर कुनि आबु छूलस निश लगी राथ  
 छँजल यारे खँसिथ गँज़रॉव्यजे साथ  
 हवा आसी मॅछयुल मॅस्ती सु खारी  
 मॅदुर्य म्यवु चानि बापथ कृत्यु च़ारी  
 लरा त्रॉविथ मत्यो जल्दी च़ु कॅर्यजे  
 वनन मंज़ यारि हुंद शेहजार पॅर्यजे  
 द्रहय छ्वकनुॉव्यजे मन शीनु वाने  
 यि क्वदरथ र्वफ छि सॉबरान दानि दाने

थकख योद डोकि कुनि ठॅहराव कॅर्यजे  
 पखन तापस अंदर वाहराव कॅर्यजे  
 वतन प्रान्यन करख योद ग्राव कॅर्यजे  
 च़ु मँज़िल छारनस पोज़ वाव कॅर्यजे  
 च़ु शहरस दूर नीर्युक ख्वश हवा चख  
 अमी सुत्यन पज़ी हो सीर सपनख  
 च़ु ल्वकटुय जानुवारा दूरि बासख  
 सरस सुबहय फोलिथ पम्पोश शूबख

च़े फेरी माय सबज़ारुच नयन हुंज़  
 लबख असरार बूज़िथ नय नयन हुंज़  
 खँटिथ मँज़िल छु योदवय दूरि दूरे  
 फुलय डेशख थर्यन वति मूरि मूरे

अवेज्ञान आबशारन ज़ोर मँग्यज़े  
 तयस प्यठ ऑस्य् यिम तिम दोर मँग्यज़े  
 च्च अज़ली गाटुजारुक्य् तोर मँग्यज़े  
 यरादन पूर काह शथ पूर मँग्यज़े

गँनीमथ वक्त छुय च़लुवुन यि छुय पॉज़  
 कमंद लायिन्य् हवावस ज़ान शुर्य लॉज़  
 कदुर होशस करुन्य् पज़ि सातु सातय  
 करुन रुत आसि तथ गव जल विहातय  
 अशुद यिनु साँ लगी माल्यो ह्यसुय थाव  
 वतन हुंज़ु बूटि पानय वारु परखाव  
 पिलव कर बालु बालय जल च्च वातख  
 यि मँज़िल सर करख वसवास त्रावख

वुडव कर शोकु मॉदानन नज़ान गछ  
 खँनिथ नक्शाह व्वंदस अंदर रछान गछ  
 छि मोहरुच तेह रंगारंग पल यि छावान  
 दँलीला प्रॉन्य् रँछरिथ बोज़ुनावान  
 स्वंदर स्वनहॉर्य् मंज़र योद च्च डेशख  
 वेखुच़ पँज़ दास्ताना नँव च्च बोज़ख  
 सन्यन सीरन सनख मदहोश सपनख  
 च्च हालातन हुंदी पँद्य आख मेनख

प्योमुत पथ सुत्य् सुय ल्वकुचार द्युतुमय  
 रुमन वुसजार सेक्य्ल्यन तार द्युतुमय  
 यि केंछा प्रोवमुत कम कासु ओसुम  
 बनोंविथ म्वख्तु हारुक हार द्युतुमय  
 अबलवुन्य् द्वहु दबलवुनि रॉच़ सारेय  
 जवॉनी हुंद नेहल समसार द्युतुमय  
 कथन माने वतन आकार दित्य्मय

मे सारी वॉसि हुंघ असरार दित्यमय

अमर सपनख च्नु कॉयिम थॅव्यज़ि ह्यमथ  
छु रोज़ान जिंदु सुय यस आसि प्रज़नथ  
अमा पोज़ जिंदुगी हुंद तख छु तख्तय  
शहन हुंज़ गॅर वॅमिस पॅच अस्तु अस्तय  
छु वोनमुत गाटल्यव वक्तस प्यठुय क्राव  
पगाह क्या आसि ब्रॉटुय कुस वुछिथ आव  
यि बावुन आसि तथ पज़ि पूर परखाव  
छे तूफानन अंदर अज़ नूह संज़ नाव

ओबुर व्वन्य आसि ज़ॅर्ययिक्य शाल वोनान  
सियाह गटु आसि वापस तेज़ दोरान  
लर्यन जायन वुछख बुथ्य खस्तु गॉमुत्य  
दरो दीवार आसन आवसेमुत्य  
बॅरिथ लोला गुटन गामन पकान गछ  
यिहँघ तसवीर चॅश्मन मंज़ रछान गछ  
रुचर पाठा कॅरिथ ऑही मंगान गछ  
च्नु नारस मंज़ ति पोशे कुल्य ववान गछ

च्ने यादाशुक सॅदुर थोवमय मे हॉज़िर  
तुलख तसवीर यिनु बा वायि वॉफिर  
द्वदस आसी बराबर पोन्त्य मिलविथ  
करुन ब्योन ब्योन च्ने छुय लोब पानु रूज़िथ  
वुछिथ सूचिथ प्रज़र च्नुय अँन्यज़ि छॉरिथ  
करय बो दायि खॉरा टूप्प वॉलिथ  
नॅवुय अख श्रूच शाय़ा शूबराँविथ  
बु प्रारय शाबशिक्य मेहराब खॉरिथ

गुलालन हुंज फुलय आसी तयस प्यठ  
 कुलिम पोशन छलान बुथ शीनुची छठ  
 वतन अँद पँख्य् सब्ज पँजि कुचु डेशख  
 फुलय सँदिजे हुंजुय यँच कौल्य् छावख  
 वसान शामन ओतुय लोत लोत मलौयिक  
 वनान तिम ज्ञान जँरियिक्य् खासु लौगिथ  
 सु मंजर अक्सुनौविथ डौल्य् अँन्य्ज्यम  
 मँदुर त्रेशा ततिच यँच कौल्य् अँन्य्ज्यम

छे जाया अख नखय पथरे अँकिस मंज  
 करान छुय पोन्य् अँत्य्नुय हिकचनुय संज  
 यिवान ओत शहनशाह ओस्य् दरशनस कुत्य्  
 सफीरो संत सौलौन्य् साद ह्यथ सुत्य्  
 अँती तपु रेष्पु वुछख तपसी अंदर मस  
 तिमन खँचल करख यिनु सौ हवावस  
 कँशीरे किच मंगुख ओही तु शाँती  
 शफा ज़खन, गमन यकसर दफौयी

गछी मुमकिन सतन नागन दि नज़राह  
 वुछख वौरागु मँज्य् असलुक नज़ारा  
 क्वलन मंज लँहरु आसन जोरि मारान  
 ख्वने शीलन खँसिथ आसन नु प्रारान  
 भयंकर सर छि नागन अँहरुनावान  
 कथा तिम नागु दोरुच बोज़ुनावान  
 वुछख लेदुर्यन पलन लीखिथ च्चु सैज़रा  
 रुमस रुमस कँशीरे प्रोन थज़रा

शौगिथ शाहमार पल छी डाफ त्रौविथ  
 च्चु तिम बेदार कँर्य्ज्यख हाल बौविथ  
 तु दँप्य्ज्यख कँह कँरिव चारा व्वपाया



कनस तल वारु वॅन्ज्यख म्योन दाया  
 शुबान प्रागाश छुय अति कोहु मालन  
 व्वथान छी ज़ितनि अंबर चांदि थालन  
 फॅकीरन हुंघ दॅपित्य लीखिथ छि गोशन  
 तिमय आसन करान आलव मनोशन

विशोकाये छु मातामाल व्रॅम्य सर  
 ग्रज़ान अख सीमिन्या बेबाक नदहर  
 तॅमिस ज़ामुन्न छि स्वंदर टॉठ कूरा  
 नन्नान नारन अंदर युथ रूस्य हूरा  
 वुहुर्य वॅरियस थवान त्रेशा म्वयस्सर  
 चॅटिथ वछ यावु कूरा नाज़े अदफर  
 खॅसिथ नार्यन नट्यन शोमुरावनय पान  
 पलव छिस नील्य लॉगिथ ज़ांह नु ठॅहरान

बॅटिस अमिकिस वुछख अख स्वर्गु दारा  
 यि ज़ुव छुय कायनातुक शाहकारा  
 छि नागुय नाग अति आबुक नु परवाय  
 वुडुर रीशिम्य तु यिमनुय पोशि बुबराय  
 गुहुल शुहला तु शेहजार सरापाय  
 छे पातालस अंदर आसमानुची छाय  
 अती जन्मेजियस ऑस पूज़ि हुंज़ जाय  
 च़ु अथ च़कलस अॅचिथ मॅग्यजे पकन पाय

मकाना ख्वश यिवुन र्योश ज़न कुनुय ज़ोन  
 सौतुर आंगुन ज़ुन्न हुंद ज़ून वरशोन  
 नमन हुंद रथ छु छॉविथ सेरि सेरे  
 छि बोलान जानुवर अति वेरि वेरे  
 छु ऑद पोख बे बसी हुंज़ दास्ताना  
 च़खे गोमुत शराफत कुय जहाना

छे नॉरन दग तु वोलान बीनु बीना  
वॅसिथ प्योमुत छु वाजे हुंद नॅगीना

किताबन हुंघ वरक छॅकरिथ परेशान  
न्युमुत सोरुय तु अख अख चीज़ वॉरान  
गॅमुन्न खाबन अमा कवु लाय म्यान्यन  
रुन्योमुत क्याज़ि म्योनुय श्रूच दामन  
सु माहोलुय अमा छ्वकु दौंघ गोमुत  
फॅकीरा नारु गजि मंज़ आवुस्योमुत  
चु शेरुचि दारि प्यठ बूल्या करख ना  
थॅकिथ वातख शबाह अति अख बरख ना

चु मंज़ खाबस वुछख पानय शबाना  
ख्वखुज कॅर्य कॅर्य जुवान प्रोनुय ज़माना  
द्वसन हुंद थोवमुत खॉरिथ मकाना  
नचान पां च़ादरे सुत्य् जँद्रवाना  
सुबह जोदल तु मस मिलि म्यूठ शामा  
स्यठाह मॉसुम तु न्यश बोद राज़ दाना  
शुरा माजे चवान द्वद दामु दामा  
छेये पार्यव वॅलिथ सिरसॉव्य गामा

यिवान बुलबुल पिचान दमदारि लॉरिथ  
निवान रिक्क्यबे मंज़य फॅल्य् जोंटु मॉरिथ  
च़र्यन हुंज़ दोंकु दोंखा कावु जॅशना  
वसुन रुकने लमस ज़ालुन सु फ़ोवा  
क्वले अंदर स्व च़लुवुन्य् बॅड महाना  
खसुन प्वतल्यन करुन बे वायि श्राना  
सु फेरुन दॅय द्वहस कुनि कुय नु शोकाह  
अचुन नेरुन तु काँसी कांह नु रोकाह

छि वुशनेरुक्य खज़ानय आखताबस  
 वॅरी गाशिर्य छि वखनय तथ हिसाबस  
 व्वथान चांदे वरक येलि ज़नु गाशस  
 सितारन वाँस ज़ेठान आबो ताबस  
 छे क्वदरथ ताह ब ताह कम चीज़ थावान  
 छे न्यामॅन्न कुचु द्वहदिश मुफ्त ख्यावान  
 खॅटिथ दरती हुंदी छी सीर सॉरी  
 शुन्यस शख्ती छि व्वपदान ताबकॉरी

रंगन म्युल गव तु बास्यव आसमाना  
 रवाँनी मंज़ ज़मानन हुंद ज़माना  
 छु असमॉनी बलायन गाह व्वथान ठान  
 गहे स्वंज़ल खसान क्यमखाब वोनान  
 वनुन मुश्किल छु योदवय अथ सनान छुस  
 बु रॉविथ यथ शुन्यस द्वहदिश नमान छुस  
 बु सॅद्रन कुन दवान आबे रवान छुस  
 कलस प्यठ बार बोरा ह्यथ खमान छुस

वॅसी अज़ी समावाता यि आलम  
 न छुस कुनि अंद नय छुस तार मॅहकम  
 पज़र ज़ानुन स्यठाह छुय कूठ यारो  
 गरस पनुनिस करुन छुय लूठ यारो  
 नॅसीहत क्याह करय छुख पानु वाँतिथ  
 गोरूरुक सुह यिनो थावी च्ने पॉविथ  
 अगर लूबन रोटुख कॅह छुय नु प्रावुन  
 अहम मंज़ बाज़रस मा शूबि त्रावुन

अहम रावुन लबुन छुय गाशदारस  
 अहम गटि मंज़ छु त्रावुन गाश गारस  
 अहम गव काँसि बापथ पान मारुन

अहम तपसी कॅरिथ पारुद छु कारुन  
 च्चु नादुक्य् पॉठ्य वॉतिथ शायि शाये  
 किहीं आसी नु लोज़ख म्यानि बाये  
 ज़हुन्य् यिनु केंह ति सोचख रायि राये  
 नखॉ वालुन हसॉ छुय पायि पाये

यिवान स्वरमॅल्य् नज़ारन रख्त लागान  
 वनन पवलनुक छु कुस परवानु सोज़ान  
 छु शामुक राज़ वातान रॉच्च वरने  
 नबस नीलिस सु तारख मालु जरने  
 दिवय गाशस लगान येलि आसमानस  
 नज़ान जालार बासान शीशु खानस  
 ज़गथ मातायि हुंद अदु वारु सॅर्यजे  
 खॅसिथ कुनि बोनि बॉथा म्योन पॅर्यजे

★ ★ ★

शालुमॉरन नामदारन हुंद शहर  
 नावि हाँज़न चाक़ वार्यन हुंद शहर  
 गंज, बाज़र, गोशवारन हुंद शहर  
 फोजमच्चन मस्तानु वार्यन हुंद शहर  
 बालु ख्वनि मंज़ मालु पम्पोशन करान  
 खूब रोयन माह जबीनन हुंद शहर  
 बुर्ज़ पश वॅथ्य्मुत्य् नखस प्यठ ह्यथ बहार  
 स्वनहरी कलसन मुनारन हुंद शहर

दफतरन तय अफसरन हुंद कारगाह  
 कारखानन बारगाहन हुंद शहर  
 पारकन कोछन मनोशन शूबरान  
 ऑनु खानन, ताशु वानन हुंद शहर

होटलन तय फॉशनन हुंद इश्तिहार  
 मॉर बॅठ्य बॅठ्य डल शिकार्यन हुंद शहर  
 नवजवानन वलवलन आलव दिवान  
 जेलखानन इनकलाबन हुंद शहर

माहरेन्या त्रॉविथ छे दॅल्य् आबस अंदर  
 लोलु मॅन्न क्वसुताम चॅज खाबस अंदर  
 शोरु बॅर्यत्यन जलसनय अंदर रवान  
 स्वरखिया शोलान अखबारस अंदर  
 ऑलिमव सुबहय वॅथिथ ऑही कॅरुस  
 गाशु रुख शोलेयि आसमानस अंदर  
 कारुबारस कामि कारस सुत्य् मस  
 चॅद्र छल नाँपान ज़ाँपानस अंदर

स्वंदरा, मोत यस पतय सौरुय जहान  
 जिंदगी हुंघ खाब ख्वनि ह्यथ छय छिवान  
 यारुबल ख्वर छिस छलान दग छस चलान  
 सादुगी रेष्प वारि हुंजु हलमा बरान  
 ज़न छु मॅस्यती मंज़ वुडान हुस्ने ज़मान  
 दरशनस आमुत छु कुल हिंदोस्तान  
 माँज़िराथा कॅहवु जॅरिया बाँगुरान  
 वीग्य् त्रावान वनवनस संज़ छी करान

या ख्वजा डोख दिथ छु दर देवानखान  
 या छु रेडस च्नीर्य शामस कांह लमान  
 पँडिथा ज़ातुख पनुन पानय वुछान  
 या ग्यवन बाँथा छु कांह बे फुक ग्यवान  
 कॅदलनुय मंडेजि कॅर्य कॅर्य नवजवान  
 सँद्र ख्वन अँदरी छि क्याहतामथ परान  
 बाज़रन अंदर अमा व्वस द्रवस छि कुच

यार जोरा अख अँकिस लोला बरान

जूनु डबि कमि ताम संद्या चोंग ज़ोल  
 हांज़ुन्या क्वछि मंज़ बरान पोत्रस छि लोल  
 सूफियाना साज़ो संतूरो अर्क  
 कापिया फिर्य फिर्य बु लेखान केह वरक  
 मंज़ खयालन बो गरय वातान छुस  
 कुक्यलि गू गू प्यठ लंजन बोज़ान छुस  
 लहज़ुनुय अंदर शहर वॉतिथ प्यवान  
 हूर मंदोरन अंदर हुर्य क्याह तुलान

क्रालु संगरे अख शबा ठँहराव कर  
 गछ गगन गीरस ड्यकस पॉराव कर  
 गगरिबल छारुन सु वीना दत च्वपॉर्य  
 युस नु हक ख्यनुची दिवान ओस काँसि वॉर्य  
 छार सादन हुंद सु पुलहँर्य सूर छार  
 ठीक येमि सुत्यन गछान ऑस्य बख्तयार  
 बुर्ज़ु पोथ्यन वुछतु न्वसखा कांह ज़बर  
 श्री बटाह छॉरिथ अनुन सोरुय शहर

सादु माल्युन गछ नमस्कारा करुस  
 पांपरस क्वंग चारि यिथ प्रंगा गरुस  
 पर्वतस अँद्य अँद्य ज़ुचन हुंद ज़ूल कर  
 यड बँरिथ चांदे डलन मंज़ सॉल कर  
 आलमाह नोव पानु अज़ आबाद कर  
 आसि युस सार्यन गरन हुंद रॉछदर  
 दर नॅगीन तन बोनि हवुहस नॉव्य़े  
 यार छॉरिथ कुसमथा अज़मॉव्य़े

छारतन बागे दिलावर छारतन

और अछुर डेशख तु माले तारतन  
 तैत्य परेशान लॉव्य वुछ अरमान म्यॉन्य  
 कुत्य छँकरिथ व्वं वुछुख वॉरान म्यॉन्य  
 मॉर अंदर म्यॉन्य मॉसुम खाब छार  
 आसि खाबस योद लोतुय कॅर्यज्यन हुशार  
 क्याह वनय गॅयि गालखातस पॅरियि वन  
 छुम ततुर वोथुमुत ततुर तेलान रुमन

★ ★ ★

लॅरा हुथ जायि खॉरिथ ऑस मंज़ बाग  
 अमा सौतस छु कवु फोरमुत ग्वडय माग  
 सलामुन्य द्यद नसॉ जॉहिर गछान अज़  
 तु दारे हॉर द्यद छनु व्वन्य ब्यहान अज़  
 निशानन हुंद नोनुय छनु कांह निशाना  
 श्वकेमुच्च वथ तु पकवुन्य वानु लॉना  
 छु आमुत सोचु दॅरियावन मे सॅहलाब  
 तु यादाशस गछान हन हन छि बेताब

अनुन खोसा सिन्युक खॉरस कॅरिथ रज़  
 सुली फाकय फरी नेरुन बॅनिथ श्रज़  
 शुरिन्य बूज़िथ सु पर्वत शोकु लारुन  
 छर्यव अथवय नफस खारुन संदारुन  
 न रोशुन काँसि नय अथु काँसि दारुन  
 शुर्यन सुत्यन शुरा वक्ता गुज़ारुन  
 हखा बूज़िथ वसुन मँज्य यारबल कुन  
 पशस प्यठ नोव पतंग असमॉन्य खारुन

बु शुपयनु क्यव वनव ललुनोवमुत छुस  
 मोदुर मस बॉल्य आरव चोवमुत छुस

वनन हुंद मोत फिज़ा मे छेवमुत छुम  
 दिलुक अहवाल यार्यन बोवमुत छुम  
 पँकिथ पॉदुल्य वतन, वतु आसु ज़ेठान  
 अम्बुर्य चूठा ख्यवान वुठ ऑस्य मेठान  
 वंदस सख्ती तु मूसिम ज़म हरीरा  
 गज़य वॉरी प्यवान तेलि ओस शीना

ज़्यनुय मॉजा तँमिस ओस पोशि कुज नाव  
 ज़बर यादाश कथ वननुक स्यठाह चाव  
 रछान ऑसुम पेचन्य तस राजि रेन्य नाव  
 करान ऑस सारिनुय यज़थ तु रुत बाव  
 स्यठाह हमदर्द ओस कॉलास कौल मोल  
 च़लान सोपुनस अंदर छुम तस वुछिथ लोल  
 अकीदत सारिनुय अज़ पूर च़ुय हाव  
 तिहुंद रुत नाव अज़ बर संग ल्यखनाव

छु लोहूरुक सफर सफरन अंदर याद  
 तरान ऑस्य बानुहॉल्य गाह मुज़फराबाद  
 सु अख दोरा अँछन तल दीदमां छुम  
 च़्यतस अंदर मे रामायण समान छुम  
 सु रावी कुन दवुन सुबहॉय श्रानस  
 कुल्यन तल ख्वश गफा पतु च़ीर्य शामस  
 फवलान शाह आलमी दरवाज़की गुल  
 लंजन खँस्य खँस्य नघ्नान तति ऑस्य बुलबुल

सु रोशन लाल पंजाबुक गज़ुल ख्वान  
 सु मदरासुक नरायण देवता मान  
 नचेकीता र्योशा तस सुत्य शूबान  
 शोम्बूनाथा कलामा राहते जान  
 सु वीदानंद वीदन गाशु तारुख



सु अरबीदान सॅन्याँस्या शुमारुक  
 सु ईशर चंद्रा फलसफय व्यञ्जारुक  
 सु थोद ऑलिम तु साँथी गाटुजारुक

हुकमरानव लितुर लॉज माजि सीनस  
 कॅरिथ आज़ाद द्यल तुलिहस जबीनस  
 कबीरुन तय नज़ीरुन देस मोरुख  
 शरद तय खुसरवस सोन नेज़ु तोरुख  
 रुहे नानक वतन प्यठ काँपुनोवुख  
 सु गंगो जमनुकुय तहज़ीब गोलुख  
 लछन हुंघ लछ गॅछिथ बे गर, गरे द्राय  
 नॅविस हिंदोस्तानस चाक तेल्याय ।

करख ना राजु होंजो मेहरबॉनी  
 करान खॅदमत बु रोज़य वाँसि चॉनी  
 बसान शहरस अंदर महबूब म्याँनी  
 फिदा कॅरमुन्न तॅमिस पथ छम जवाँनी  
 स्व आसी अज़ वतन म्यान्यन वुछॉनी  
 स्यठाह गाटुज तु रोय छुस अँत्र दाँनी  
 फकत लोलाह छु बोरमुत पानुवाँनी  
 दॅलीला रोज़ि पथ प्रेमच कहाँनी

तॅमिस हूरे मे गव वुछनस ज़माना  
 स्यठाह ख्वशवुन्य मॅछिज काँचाह छि दाना  
 सॅनिथ गॉमुन्न तॅमिस छय माय म्याँनी  
 वनान ऑसुम “चु छुख ना यारि जाँनी”  
 तॅमिस दूरी गॅडिथ गुल्य कर नमस्कार  
 तु दॅप्यज़्यस “वारु छा साँ चोन गरुबार”  
 निशानय म्यानि सुती परज़ुनावी  
 करी कॅहवा तु कंदी कुलचि ख्यावी

मुहब्बत ज़िंदगी छुय माने बख़्शान  
 कॅरिथ सैकल रुहस आँना बनावान  
 तॅमिस आसन गछान वुनि ब्राँत्य् म्यॉनी  
 शेछा बूज़िथ यियस मा नॅव जवॉनी  
 खबर वॅन्यज़्यस तु दॅप्यज़्यस वारु छख सॉ  
 पकान प्रानी तमी अनहारु छख सॉ  
 च़ु कॅर्यज़्यस ज़ारु पारा आय मॅग्यज़्यस  
 अमा पोज़ च़ूरि च़ूरी दाय वॅन्यज़्यस

“दिलस म्यॉनिस दिच़ॉयथ थफ गज़ॉली  
 बु चाने दादि सॅन्यॉस्या गुपॉली  
 स्वखल एहसास पानय नॅदरि तुल तख  
 अँछन मंज़ पोशिवुन्य् अनहार अनतख  
 विसुन चोनुय तु तिम कॅह सात चॉनी  
 तिमय सरमायि दौलथ स्वय छे म्यॉनी  
 जवॉनी हुंद मच़र शोच़र तु मॅस्य्ती  
 म्वखस चॉनिस छे मा फुलिथ व्वदॉसी

खयालन मंज़ दूहय म्यानन वुज़ां छख  
 करख ना विह तु साथा यूर्य वातख  
 वतन चान्यन दवान ननु वोर नेरय  
 युथुय डेशथ बु शेरे ताज शेरय  
 ठॅरी ठॅर्य् छिम कथन खुर्यनाव आमुच़  
 स्यटाह गॉसिल दिलन अंदर सम्यामुच़  
 अमा कुस कासि खुर कुस आसि रुस्तुम  
 फकथ सॉरी छि हावान पॉन्य् यायुम

दिलस अंदर खॅटिथ यारानु चोनुय  
 नखय वालान छुस दूह दूह पनोनुय

छु रुम रुम मुश्कुनावान नाव चोनुय  
 च्चे लॅग्यनय आय, जुव छुय पेश म्योनुय  
 च्चे ते शायद यि वेह तेलान आसी  
 अँछर वालन ज़हर कहरान आसी  
 छु गाहे वख च़लान मीज़ानुवुय दूर  
 हरान पन योद ज़्यवान पोज़ हर्दु पोंपूर

परेशॉनी कॅशीरे बागि आमुच़  
 वेखुच़ ज़ाथाह वनन अंदर छि ज़ामुच़  
 चलान छय गोलि यिनु साँ मारु सपनख  
 पखन यिनु कुफ लगी नाकारु सपनख  
 डरय बासी अगर वुफ़ वार कॅर्यजे  
 कनॉदरि सानि वापस तार कॅर्यजे  
 छु साँनिस आंगनस नागा ब दसगाह  
 वँसिथ तमि नागु चेज़ि अख त्रेशि दामा

सुबह वुफ दिथ तँमिस वन साँर्य हालाथ  
 च़्यतस यिनु पावुहस बेयि प्रॉन्य वाकाथ  
 तसुंद अहवाल सोरुय याद थॉविथ  
 वच़न तँहँदी च़ कुनि किन्य अँन्यज़ि छॉरिथ  
 इजाज़थ ह्यथ तसुंद तसवीर अँन्यज़्यम  
 निशाना कांह च़ बा तदबीर अँन्यज़्यम  
 पशस तिहँदिस बिहिथ वुछिजे नज़ारा  
 लँबिथ अँन्यज़्यन सु असुवुन रुत शहारा

बलान छ्वख छी वलेकिन कथ छि रोज़ान  
 किहीं मतु रुज़्यतन पोज़ सथ छि रोज़ान  
 दूदुर इनसाँन्य कदरन क्याज़ि च़ामुत  
 ज़मानस साँर्यसुय खुर क्याज़ि आमुत  
 रेष्यन हुँद्य कँह वच़न अँन्यज़्यम च़ छॉरिथ

बु प्रारय लोलुकी दसवानु पौरिथ  
 बु तोत तामथ बहारस रोजु प्रारन  
 फवल्यम येलि ताजु फुलया रेगज़ारन

व्वलो हा राजु होंजो दूर नेरव  
 स्यठाह वॉनाख जायन चूरि फेरव  
 हु ज़ा शुर कुस सना त्रॉविथ छु द्रामुत  
 कॅमिस सन ज़ॉलिमस युथ व्वंदु आमुत  
 अॅमिस इनसॉनियथ रोयस छि पेडान  
 छु ज़गतस सोपनु किस मंज़ फ्रुस्तु डेशान  
 यि शोरो शर वुछिथ छुय काँपुन्योमुत  
 छु यथ वॉरान जाये बागि आमुत

करॉयो गूर हा जानानु गोबरो  
 च़ु यथ वॉरान जाये क्याज़ि आखो  
 अमा कॅम्य् संगदिलन त्रोवुख वते प्यठ  
 हवस कारव च़ु सोवुख खाकुसुय प्यठ  
 र्वने मंज़लिस अंदर हो हो करॉयो  
 अनंतनागुक बु वतने गुर अनॉयो  
 मे वन सॉ कुस रछी कुस शीर लागी  
 च़े सहरावन अंदर कुस बोलुनावी

च़े ऑसस माजि हुंज़ बब कुस सॉ त्रावी  
 गुगॉ मंज़लिस अंदर कुस मालि सावी  
 बरी कुस लोल मनि अंदर च़े थावी  
 च़े ऑंगजे थफ वॅरिथ कुस ज़ून हावी  
 ड्यकस दिथ मीठ्य कुस सॉ सम्बुलावी  
 रॅटिथ नालय, नखस कुस ललुनावी  
 छि फुट्यमुत्य् प्रॉन्य् परमानय वनय क्या  
 छॅरी सॉरी छि पैमानय वनय क्या

खये अंदर पेमुच्च लाशा छि कॅम्यसुंज  
 छे फॅटमुच्च लाय आशायन यि कॅम्य सुंज  
 पेमुत्य ऐवान इनसाफुक्य छि पॅथरिस  
 कॅडी कॅड्य क्याज़ि खॅत्यमुत्य् बूमि सॉरिस  
 वुछान सॉरी मगर जूरथ नु काँसी  
 दज़ान दुनिया मगर फुरसथ नु काँसी  
 अमा कांह हातमा गछि ना सॉ बेदार  
 छि हॉकिम चूरि कोनूनय छु खुर्यदार

खोलूसस म्वल छु वोथमुत दर ज़मानु  
 वसान छय लाशि दॅरियावन शबानु  
 छि खॅत्यमुत्य् नारु तॅत्य् बुतरॉच्च काँत्याह  
 क्वलन हिर्यवोल होखमुत छुख नु दसगाह  
 छु वुडरन सीनु बिर्यान शाल वोरान  
 कथा काँसी नसॉ छय साफ फोरान  
 स्वंदर नगरन अंदर द्रॉठाक फेरान  
 कॅरिथ लूठा, मुहिथ असमथ छु नेरान

नज़ान वुर्यानु सॉरी कस छु परवाय  
 जॅमीनो ज़र ज़नानन हुंघ वेखुत्य् न्याय  
 जवानन हुंज जमाथा कोर लारान  
 वनान यिमनुय प्यठन अॅड्य दिल छि हारान  
 छु नफ्सुक नार तेज़ान सादुगी लूठ  
 नशस अंदर छि लॉगिथ मोतुकी सूठ  
 ज़मानस क्याज़ि लीखिथ रो-सियाँही  
 ड्यकस लीखिथ छि गाशस मंज तबॉही

मलॉयिक खोफु की प्रथ जायि फेरान  
 छि नॅदरे मंज कॅरिथ खश साफ नेरान

छु मुल्खाह यथ ज़मीनस स्वन छु व्वपदान  
 मगर द्रागन अंदर अति लुख परेशान  
 यि मुल्खाह, आबुकी बॅर्य बॅर्य खज़ानय  
 मगर अति त्रेशि हतिनय ज्यव दज़ानय  
 अथस येलि ज़ाथ वुछनय क्याह करख वन  
 सरफ अँदरी च़े बुछनय क्याह करख वन

महा नगरन छु वोलमुत नाल हाये  
 तरक्की योद छि बासान जायि जाये  
 गरन अंदर छि बासान दुह्य छ्यवय हिश  
 छे बासान पानुवुन्य अज़ सारिनय रुश  
 हवा छुनु दारि पटिनय पान छावान  
 अँकिस अख कांह नु अँदरिम हाल बावान  
 छु तहज़ीबस गोमुत कुस तां वकानय  
 गरन अंदर अँचिथ रावां ठिकानय

कुल्यन गॉमुच्र मँशिथ पनुनी छि पहचान  
 अँछन अंदर यिवान छुनु न्यूल असमान  
 सियाह रॉचन अंदर इनसान वोलान  
 कुमुर्य कस्तूर खालुय व्वन्य छि बोलान  
 ज़मीनस ताल दँज़मुच्र नम छि नीलान  
 यि दुनिया आयि पनुने छुय नु जीलान  
 सफर कॅर्य कॅर्य छु मँज़िल वारु दूरान  
 कॅरिथ मेहनत करोरन छुय नु पूरान

सियाह स्वन सारुने कमु लॉलु नेरान  
 गछान छख कॉलु गिर्दाबन छे फेरान  
 दवा दाद्यन छु मा दरमान सपदान  
 ज़हर खेय खेय ज़ख्म वोलान वोलान  
 सु मॉलन हुंद अमा कवु ह्वल ह्वलय रोव

जवॉनी हुंद मज़र तय वलवलय रोव  
 दज़ान दरती छु मुर मा वारु वारय  
 गछ्छयस मा फान, सपद्यस योद नु चारय

दुहिस अंदर सियाह सुबहुच महारॉन्य  
 गमन अंदर च़मान शामुच छि मॅल्यकान्य  
 संगरमालन गुल्यन ज़ोलानु त्रॉविख  
 छम्बन छालन सबज़ तुल्य् ताम ज़ॉलिख  
 ह्यडर ज़ाथा वॅथिथ आमुच छि वेखच्युय  
 यि दरती क्याज़ि गॉमुच आरु कॉच्युय  
 गोरूरस मंज़ स्यज़र संतोश कोत गव  
 व्वमेदन हुंज़ स्व ह्यमथ जोश कोत गव

कोरुन अल पल शुरिस ज़्यव आयि जल जल  
 कदम कडनुक करान ओस पानु हल हल  
 यिथिस ज़गतस अंदर वॅम्य् वातुनोवुस  
 अमा वॅम्य् बुज़दिलन यथ जायि सोवुस  
 बु सोपनस मंज़ गिंदान ओसुस खबर कथ  
 मे ऑसुम ज़िंदगी प्यठ वारियाह सथ  
 वॅनिथ हालाथ यिम सॉरी खतरनाक  
 यि बूज़िथ म्योन मॉसुम सीनु गव चाक

खॅसिथ हुथ संगरस प्यठ त्राव सॉ मे  
 ग्रदन जानावरन पुशराव सॉ मे  
 बु यथ ज़न्मस शुरुय व्वन्य् रोज़ु वॉसे  
 वुछम यिनु कांह तु अथि यिमु मा बु काँसे  
 हवा आस्यम ख्यनस वथरावनस शीन  
 यि सॉरुय क्वदरथा रोज़्यम मे तॉबीन  
 अँज़्युक आदम बु पानस दूर थावन  
 यि आलम वॅद्य वॅदी बो अँहरुनावन

बु सॉद्रवार फिज़हस लोज़ करने  
 नयस्तानन बु फेरय सॉल करने  
 छे बेहतर दूस्ती अज़ अँछदरन सुत्य्  
 सुहन तय हापतन जानावरन सुत्य्  
 रछन मे शीनु मँहनिव्य् गूर करनम  
 फिरिशतय जोलि मंज़ इनसाफ बरनम  
 बु गालख तोसबुक्य् नाकारु हालव  
 मुहब्बतु क्यन ठिकानन लायि आलव

यि क्वदरतुची किताबा वारु मुच्चरिथ  
 थवख प्रॉनी पज़र बेयि वारु शीरिथ  
 बु पॉज़न सुत्य् फेरय आसमानस  
 चुह्यन मंज़ छठ कडय कुलहुम जहानस  
 दिलुक्य् एहसास शेलन चित्रनॉविथ  
 पनुन्य् मूसिम थवख पानय सम्बॉलिथ  
 मे तारख नब यियम अदु तूर्य गारान  
 बु नेरस योरु ख्वशवुन्य् नगमु वायान

अनन येलि जानुवर फल फूल छॉरिथ  
 थवन मसतस मे रीशिम वाँकु पॉरिथ  
 इशारन मंज़ मे बावन सीर ज़गतुक्य्  
 फुटन सरहद थदन इमकान लोलुक्य्  
 पकान कुल्य् तेहरिवुय पेठ्य आसु नेरान  
 लंजन प्यठ ऑल्य् नँव्य् नँव्य् आसि येरान  
 वटख बीमुक्य् तु वँहमुक्य् सॉर्य दफ्तर  
 यलय त्रावख सरी इनसाफु आगर

मे तखलीकुक्य् रँसिल्य् सरमद थनु प्यन  
 तु नूरुक्य् बे बहा असरार व्वतलन



घटख ज़ोलानु इनसानस सरासर  
करख आज़ाद सॉरी ज़ानु आगर  
नबस प्यठ रोज़ शोलान गाशु तारुक  
ज़माना नोव रथा खारन खलूसुक  
बॅदी हुंघ मूल गॉलिथ वारु सॉरी  
करख नीकी हुंदी दफ़तर बु जॉरी

★ ★ ★ ★ ★

## वचुन

राज़ु होंज़ा ब्यूठ कनु दारे  
लोलु वारे दारि मुच्चराव  
आयि वनवान कॅतिजि तु हारे  
लोलु वारे दारि मुच्चराव

यार कुस ताम यारस छारे  
रंगु वासन पौराव कर  
हंगु दारस कूला खारे  
लोलु वारे दारि मुच्चराव

तार अमृथ नारे नारे  
गाशु ब्रारे दर्शुन प्राव  
सूर सासस लाल मा चारे  
लोलु वारे दारि मुच्चराव

गछि दॅय योद पानय यारे  
ज़्यतु नारस ख्वर ठहराव  
मजबूरस शायद गारे  
लोलु वारे दारि मुच्चराव

★ ★ ★ ★ ★

## नगमु

होशि हतिनुय लोल बावान आस बो  
 रोशि पथरे पोश छावान आस बो  
 नारु गजि मंज्र चंद्रनुक मुश्काह वुछुम  
 चॅल्यमुत्यन दिल रंजुनावान आस बो

समयि यिरवुन्य नावि वुजुनोवुम जिहन  
 शेरने बुथ द्रास पानय कोसमन  
 ह्यकमथा स्वय आजमावान आस बो  
 लोल मोत सुय सौंथ छावान आस बो

पजरु म्वखु चव ना जहर स्वकरातुनुय  
 फासि खोत ईसा तु वुछ अर्सातुनुय  
 जहरु मँज्य अमृथ व्यन्नारान आस बो  
 दोसदारन पानु गारान आस बो

वॅथरु वॅथरय पनु वॅथुर सौबरॉव्य तव  
 अमनु सुत्यू रेष्पु वॉर बेयि मुश्काँव्य तव  
 दूर पेम्पुत्यन नाद लायान आस बो  
 बेय तिथय पॉठ्य सौंथ छावान आस बो

★ ★ ★ ★ ★

नज़रानु  
**हा अलमदारु सानि**

चारुकि नुंदु बानि  
थोद व्वथ रेशि सानि  
कॅयमूहु कि ग्वसानि  
रुवपु वन के लानि  
लोलुकि स्यंदु वानि  
वेथि हुंदि श्रूच्चि पानि  
कॉशिरि आगु म्यानि  
**रेष्पु वारि कॅम्पु द्युत नार**

हनि हनि ज़ॉजिख  
कनि कनि वॉजिख  
तँद्वजन लॉजिख  
कूट्यन खॉजिख  
लोत पॉठ्य गॉजिख  
रच्चि रच्चि गव लुर पार  
**रेष्पु वारि कॅम्पु द्युत नार**

बारगाहे ऑली  
स्वनु अंज़ॉली  
चमर तु त्रॉली  
पंजरन ज़ॉली  
मीनार डॉली  
चोर बाम चॉली  
कॅम्पु ज़ॉल्यु मन वन ज़ॉज  
कस ओस सोन खारु खार  
**रेष्पु वारि कॅम्पु द्युत नार**

श्रुक्य् चॉन्य् सब्ज़ार  
 जिगरस शोहजार  
 तमहस लारु लार  
 बदलय समसार  
 स्वर्गक्य् सेतार  
 कॅम्य् चॅट वज़ुवन्य् तार  
**रेष्य् वारि कॅम्य् द्युत नार**

अथुवास सोनुय  
 सुम सोथ प्रोनुय  
 चोनुय तु म्योनुय  
 लसुन बसोनुय  
 असुन ग्यवोनुय  
 रुत पोशि वोनुय  
 कुस व्यसु तोनुय  
 बागन अचोनुय  
 खेतन पकोनुय  
 रादन वुछोनुय  
 आदन पनोनुय  
 पॉथुर गिंदोनुय  
 दानस प्यवोनुय  
 क्वदरॅच्च सनोनुय  
 यी ओस सोनुय कार  
**रेष्य् वारि कॅम्य् द्युत नार**

कॅम्य् कॅर मॉसुमन लाय  
 कति वॅछ गोलि ददराय  
 कॅम्य् मॅछ स्वंदरन हाय  
 गोशन कॅम्य् छुन्य् क्राय

हनि हनि कँड्य तेल्याय  
गाशस प्यठ पेयि छाय  
गरदे बुज्ज्य् गँयि माय  
गर वाल्यन पर लार  
रेष्य् वारि कँम्प्य् द्युत नार

नुंदु रेष्य् लालो  
बरयो थालो  
म्वख्तय मालो  
द्वह चॉन्प्य् पालो  
लँग्यमुत्प्य् ज़ालो  
कोताह च़ालो  
फुचमच्चि नावि दित्तु तार  
रेष्य् वारि कँम्प्य् द्युत नार  
★ ★ ★ ★ ★

## अख तसवीर

खुर्यदार तंग सडक छि  
 सूर्यपिन्थ हिश होल होल पॅकिथ  
 मकानु बरस तल रूज़िथ हिश गॉमुच्च  
 छतुक पंखु - कालु चॅक्र छु  
 हंगतु मंगु रोटु गोमुत  
 कमि ताम सैकि सहरावुच छ्वपु छय  
 सौर्यसुय कमरस तेलेमुच्च  
 कमरु दारि मँज़्य छे क्रकु ज़ोरु अंदर अज़ान  
 छ्वचि, ज़ेछि तु खँर्यवुनि क्रकु  
 अमा पोज़ बु अमि सारी निशि बे खबर  
 ज़ेहनु किस वँसी कैनवासस प्यठ  
 पनुनि ज़िंदगी हुंद अडु गोर मडु गोर तसवीर  
 बनावान बनावान व्वदॉस्य

★ ★ ★ ★ ★

## पनु पोंपरिस कुन

पनु पोंपरि कथ छुख कलु ठासान  
 गतु ग्यूर करान कनि देवारन  
 मंदोरि थज़ी पखु वाव करान  
 ज़ेछर योदवय छुस ज़्यूठ स्यठाह  
 पोज़ रोज़न वॉल्य् छि अति मजबूर

कड वाश पखन वुछ सुबहुक परतव  
 बाशि करान क्याहताम परान  
 अनहार वुज़ान खामोश कुल्यन  
 पनु वेंथुर छि सॉरी वुनि नैदरी  
 छवपि हुंद राजुत, छ्यकु ओबरुचि  
 नार्यल कुल्यन क्याहताम पृछान  
 नबु नीलु सरस गतु ग्यूर करान

थज़ि टंकी प्यठ जानावाराह  
 ज़न स्वपनस मंज़ असमॉन्य वुफान  
 छुनु सिरिं ज़ुचव वुज़नावुन ह्योतमुत  
 केसुर्य पान  
 अखताबु छु सखरान नालु मँतिस  
 प्रां ऊषा

वलु नेर न्यबर, कनि खम्बर्यन कथ छुख मॉल बरान  
 येति हॉरिथ गॅयि कम कम दिवता  
 कृत्यव वलु वीरव फेकि खे खे  
 वक्तुक्य् ज़हराबु दहानस बॅर्य

पनु पोंपरि गथ कर आकाशस  
 सौजलि पेठ्य जंगलव, छाला तुज



यथ ब्रह्मांडस छुनु आँथुय कांह

व्वलु यूर्य दमाह कथ बाथ करव  
बु ति आमुत दूरि मुसाफिर छुस  
गरि छुस द्रामुत ननुवोर च़लान

मनुचन दार्यन छिनु आसान तौर्य  
छुम आँनु अँछन शिंक्या तेलान  
पख यूर्य मे निश कवु खोच़ान छुख  
यथ पोशि कुलिस वन म्यॉन्य व्यथा  
हुथ च़ँडी दारस नज़रा कर  
महिशास्वर कृत्य छि वुनि फेरान  
वुनि स्यज़रस पज़रस सुत्तु छे दुय  
यथ शहरस मंज़ कति रोज़ुन छुम  
कुस मँज़िल म्योन पताह कति छुम

पनु पोंपरि व्वलु पँहरा बेहमव  
दरती ह्योत सिर्यस आलव द्युन  
ऊषा खँच़ नॉविथ शंगरँफ्य पान  
गेशमावुन बुथ ह्योत कोह मालव  
पनु पोंपरि कथ छुख कलु ठासान

★ ★ ★ ★ ★

## खामोश शायिर

द्यानस मंज़ ओस पोशि कुला अख  
 लॉगिथ शेरि गुलन हुंद ताज  
 पृछुमस वन सॉ कुस छुख बाया ?  
 मुश्काह छटवुन वोनुनम बोज़  
 “पानिच सिरिच मिलवन क्वस तां  
 पन अछर, पोन्क् कल्पना  
 दरती हुंद छुस ल्वकटुय सोपुना  
 व्वपरन मंज़ छुस हेनु ह्यू आमुत  
 लूकन हुंदि बापथ छुस ज़िंदय  
 गरु रोस्तुय रोज़ान छुस नेबरय  
 नावस, शोहरस सुत्त्य दुय छम  
 बु ति छुस अख मंज़ूम दॅलीला  
 वॅम्स सॉ दुनिया ज़ोनुय म्योन”

★ ★ ★ ★ ★

## चमन वुजनावि

श्वंगान येलि राथ बालन शांद थॉविथ  
 व्वथान म्यान्यन खयालन ठान लोत लोत  
 गॅछिथ आज़ाद बे परवा कलम म्योन  
 बहारन नालु दी दी शेरि लागान

नबस प्यठ तारकन हुंज़ु छालु डीशिथ  
 वछस तल रुठ्यमुत्य् अरमान तोशान  
 खयालन हुंघ मलख नेरान सॉलस  
 गहे दूगन्यार डीशिथ होल गंडान दोर  
 गहे सनिरस अंदर म्वख्तस दिवान जॉल्य्  
 गहे शशदर वुछान रुज़िथ छि हॉरान  
 अमा यथ कालु गटि गाशुक पताह छा ?  
 छु खुर आमुत निज़ामस डेंजि हुंघ पॉठ्य  
 च़ु पनु तॅल्य् डींज अनतस डेंजि तॅल्य् पन

सनुन गोछ प्रथ अकाह यथ कायनातस  
 गरज़ त्रॉविथ बरुन गोछ ग्वड हयातस  
 गुलॉमी हँघ च़ु कुत्य् बलनुक दवा गोछ  
 रवा गोछ मायि हुंद पैमानु आसुन  
 स्वखुक सामानु गोछ व्वन्य् आम आसुन

बहारस ग्वड बरुन छुनु केंह ति आसान  
 यि गव स्वकरातु सुंघ पॉठ्य ज़हर च़ालुन  
 यि गव दारस खसुन मनसूरुनी पॉठ्य  
 यि गव फ्यूचक बनून पानस करुन सूर  
 यि गव नेरुन पकुन तलवारि दारे  
 यि गव ऑशस तु आरामास करुन बस

तवय यथ रॉन्न मंज़ येलि गम व्वथान थोद  
 दिलय रावान वुछ्य वुछ्य अपज़िकुय राज  
 रगन मंज़ खून ह्यथ सँहलाब जोशुक  
 नँविस सुबहस थवान सामानु शीरिथ  
 हवा रिंगा वनान मे ति मा छु आराम  
 बु छस रातस छ्वकन मँहलामु लागान  
 तिमन हो हो करान छस यिम छि थँक्यमुत्य्  
 द्वहस यिम मेहनतुक्य् गुल शूबरावान  
 छे यिमु पथ स्यठाह समसारस अंदर  
 तिमन गमगीन हूरन छस दिवान मीठ्य

बु छस मॉसुम शुर्यन रुत्य खाब हावान  
 तिमन गोछ होशि होत अँछ गाश आसुन  
 तिमन गोछ आशि हुंद प्रागाश आसुन  
 तवय शबनम रछान छस मालु वँक्य वँक्य  
 गुलन व्वशलुन दिवान छस तिहँदि बापथ  
 ज्वयन मंज़ आब सारान छांछु वारन  
 खहन मंज़ मायि खारान दां हेल्हन छस

यि बूज़िथ सथ दिलस सपदेयि वारा  
 सोरिम अँदरी पनुन्य् तिम दोस काँत्याह  
 छि यिम इनसॉनियँन्न रुत्य् जामु शेरान  
 छि यिम अदबस अमारुक पोट छावान  
 छि यिम हुस्नस तु लोलस शेरि लागान  
 छि यिम दीनुक्य् तु दर्मुक्य् न्याय सावान  
 छि यिम नज़रानु जुव दिथ टॉठ्य पनुनी  
 दपान मज़लूम व्वन्य् कांह गोछ नु रोजुन

कमय काला गँछिथ व्वथ रात थोद व्वन्य्  
 व्वथन थोद नँदरि हँत्य् बेदार सपदन

पथर अपज़िक्य महल प्यन पॉन्य पानय  
चमन वुज़नावि कॉत्याह नग्मु लोत लोत

फवलन वुन्य टूर्य कॉत्या मुशिक वाहरन  
शुर्यन शबनॅम्य वुठन प्यठ बाशि व्वतलन  
गुलन ज्यव यियि तु सब्जस म्वख्तु छँकरन  
कुकिल गेवि राग सुबहुक दाग शेहलन  
बेहन रातुक्य मलॉयिक चूरि लोब कुन  
हँटिस र्वनि जानवारन वुन्य वजुन ह्यन  
ज़मानस गाश तय फवलि नूर बालन  
मज़र शोकुक्य अँशिस कित्य बानु शेरन  
ग्वँद्यन अँद्य अँद्य छिटल पॉपूर्य फेरन  
नव्यन बागन नॅव्य नॅव्य ऑल्य येरन  
बहारन छाय कॉसिथ मायि हँत्य कुत्य  
संगर मालन नबस प्यठ जाय शेरन

★ ★ ★ ★ ★

## ज़िंदगी

मोदुर ज़हर छु थारि ... एतिबार कर  
शुरा ग्रटस छु खारि ... एतिबार कर  
सफर छु नारि नारि ... एतिबार कर  
छु शीशि हम शकार ... एतिबार कर  
लॅरा छि रंगु वारि ... एतिबार कर  
छु नार दारि दारि ... एतिबार कर  
ज़्यनस मरन छु बार ... एतिबार कर  
पकुन छु वारि वारि ... एतिबार कर

★ ★ ★ ★ ★

## मॅत्य् आब

वूठ मत्योमुत मंज़ मॉदानस  
 साँरी पानस पानस लॉर्य  
 यस दियि कारि वुठन वुठकाव्यस  
 यस लागि तस लागि सरकाँरी

पुरसिश किछ् साँ  
 साँरी मॉलिक हाँकिम साँरी  
 गर गर राज  
 अलु शहरस साँरी मोहताज

अशराफन येति मुश्किल रोजुन  
 ज़र्य शहरस मंज़ कस क्या बोजुन  
 यस युस ख्वश गछि सुय गज़ लाग्यस  
 साँरी गाटुल्य् साँरी चॉर्य  
 बूट कलस प्यठ ख्वर ननुवॉर्य

कालू मोत ह्यू बेछान बासान  
 आँद पोक सोरुय  
 काव अय छँल्य्ज्यन सज़ु तय साबुनि  
 क्रैहन्यर त्राव्या ?  
 वूठ मत्योमुत मंज़ मॉदानस  
 साँरी पानस पानस लॉर्य

★ ★ ★ ★ ★

## नज़्म

स्वरमॅल्यु टार्यव शोख यिम्बुरज़ल  
आयि तु गव माहोल बदल  
नोव लोग मूडस आय  
नखु आव यावन राय  
नेरि तु फेर्यस कूत

★★★

फिर्य फिर्य द्रायि वुछान  
मुश्कनुय अम्बर चॅल्यु  
आलव दिमुहस वाय  
अलमन खोत सॅहलाब  
रावन त्योल तेल्योम

★★★★★



## बाल कोल्य् !

शोख बावथ छे उचकस  
 म्वख छुय शुहुल, हय बाल कोल्य्!  
 राथ आँसुख यिछ, तिछुय आसख पगाह  
 वॅरियि वादन योद पॅचिख  
 थॅचखुय नु ज़ांह  
 चोन यावुन हरनु आव  
 दामु छय रॅटमुन्न च्ने व्यथ

शीनु मान्यन शीर चथ  
 कोत च़लान छख नॉर्य दॅज़  
 छुय लेखिथ अख दास्ताना दामनस  
 सोचि क्यन सॅद्रन तुलिथ सरपोश थोद  
 शूब वुन्य् रीशम्य् हवस वुज़वान छख  
 बालु दामुन्य् सुम कडान मस्तस वॅछुख  
 पूर्य किन्य् ऊषायि छॅक्यनय रंगु टॉक्य्  
 चानि ख्वनि मंज़ रामु गुरनव लोब ज़न्म  
 तीलु सडकन चोन यावुन ब्रूठ्य आव  
 वावु माला पॅच तु वॅरिनय मीठ्य च्ने  
 स्वंदरा अज़ कालुची हॉरान हिश  
 चानि बॅठ्य बॅठ्य यादु वॅत्रिस द्यल तुलान  
 तेज़ दज़वुन्य् रेह सपुज़ फलवाँय हिश  
 दिथ पलव दाँरिथ बॅठिस वॅछ श्रानु पुच्य्  
 रॉछ कॅरथस नोवथस मखमॅल्य् बदन  
 चॉन्य् विह वुछ पोशि पथर्यव  
 त्रास ख्योख  
 सीनु हावान द्रायि मसवल शामु पॅत्य्  
 तारकव वुछ चोन रव पॅक्य् सुत्य् सुत्य्  
 दास्तानव थॉव्य् पकवुन्य् नागु राद

रूदु श्रान्यव म्वख्तु जोर चॉनिस बुथिस  
 कुल्य् लंजव कोरहय शुहुल ग्रश्मस अंदर  
 समयि सडकव आय मोंगहय पायि बोड

चोन रख येलि हर्दु हवहन दूँछरोव  
 चोन असमथ टोट गव नीलिस नबस  
 हॉरिजव खोट चानि बदनुक बोस्तान

ज़हर सागर बेयि मंदुन  
 अमृथ कलश छॉडिथ अनुन  
 तोसबुक्य् ज़ोलानु च़ठ दरती च्वपॉर्य

चानि दॅस्य् कॉत्याह सदम आसान गॅय  
 चानि वसवुनि शोकु खॉरिम बोठ मे दूह  
 चॉन्य् स्वरनय अज़ ति छुस बोज़ां दूहय  
 पोज़ ज़मानुक्य् नारु तॅत्य् छिम क्या वनय  
 बस ब्रंज़िस अँकिसुय कदम ठँहराव व्वन्य्  
 म्यानि वनवासुक छु फोटमुत नारु बाल

★ ★ ★ ★ ★

## लेबल

फुलया छँच कया सॉदरवार  
 कुलि पथ कुलि दस्तार  
 संगरन खंगरन वथरिथ थोवमुत  
 शंकर सुंद अटहास  
 बालन हुंद सँन्यास  
 सँदियन हुंद यितिहास  
 अथि ह्यथ सरस्वथ ह्यनु आमुच  
 बेयि अज़ नवि सरु मा ज़ामुच  
 पां चादर ह्यथ मनु मंज़लस  
 ऑनस अंदर ज़ीठ दॅलील  
 नपु नपु करवुन्यु शीतल नाग

ही मालुक्य छी अज़ली जूग्य  
 तन साफ तु खयि रोस व्वंदु मेछर  
 फोस वापस आमुत सँदरन हुंद  
 नबु नारस पाट्यू आकारा  
 लेबल छख लँजमुच माइग्रेंट पोज़

★ ★ ★ ★ ★

## माँसुम पां फ्योर

पां फेरि, दूह छिनु सेद्य यिनु वॉल्य्  
 वक्तस वॅछमुच्च वॅक्रु चकर  
 दुबुरायन नीलेमुत्य् नम  
 मति हावय, छ्वकु दॉव्य् जिगर  
 अँश वानि छलन मा चोन वजूद

खूनी नालस यथ गटुकारस  
 क्वदरथ वॅरिनय पानय रॉछ  
 खोफुक्य् प्रहदर नॉली नाल  
 बॉरव सॉरी सुत्य् च्ने छिय

पां फेरि, कुस मॉज़िल छुय चोन  
 सती सरस लोगमुत छुम ग्रोन  
 परदेसस मंज़ कोर लगख  
 अकि दारु खसख बेयि दारु वसख  
 तथ बुतरॉच्च गछन ना चाक  
 यथ मंज़ चोन जुवुन मुश्किल  
 लसुन मुश्किल बसुन मुश्किल

कटु काल छे राथ, त्रॅहयॉमुत साथ  
 तफरीकन हुंज़ तेलेयि वुनल  
 कांगुर फुटमुच्च अथि छय सुत्य्  
 हू हू सदी, सख कठकार  
 कुस सॉ दुश्मन, कुस सॉ यार

पां फेरि, र्वपु संज़ तन प्रॅथिनय  
 मनु सर चोन बॅनिन संगलाख  
 तॅथ्य् मंज़ फोल्नय दुनिया चोन

वैथ्यमुत्त्य योदवय छिम परगॉल्य  
ऑही म्यॉन्त्य च्चे पॅकिनय सुत्त्य

★ ★ ★ ★ ★

## पोश तु पल

पनु पोंपरि ऑविलि पोशि तुल्यो  
 तम्बुल्योमुत कवु छुख माँजि गुल्यो  
 व्वलु म्यूठ करय रंगु दामानस  
 नोजुक पानस डेकु जानानस  
 टेचि ज़ॉविजि कुस शकलावान छुय  
 वछि वॉलिंजि कुस वुफुनावान छुय  
 मे ति वन साँ कॅम्य देवानु कोरुख  
 कस पथ वन फलवा गोमुत छुख  
 किनु वेरे चाने अबुसोवुख  
 सिर्य दानस बाला बॅल्य् खोरुख  
 आज़ाद चु छुख वनु वारुक पोश  
 रंगु राँछ छि प्रारान साज़ ब दोश

यथ जायि हना बेह माय बरय  
 अथ ज़ॉविजि काये चश्मु जरय  
 मे ति हावख ना पनुनुय दुनियाह  
 अडु मोर गोमुत म्योनुय स्वपनाह  
 अख म्यूठ च्युहा मदु मोत स्यठाह  
 रथि खसवुन अख आशायि गुलाह  
 युस वोलमुत व्वलुहॅरिशव कुचव  
 युस ठोलमुत समयि गॅचव कुचव  
 व्वलु बोज़ गज़ल गॉलिब छु ग्यवान  
 रतु दाँव्य् ज़गथ हति पाँव्य् खसान  
 ज्यव मुचर तु पख कथु तारु करव  
 ननि वानु करव टाकारु करव  
 चु ति गाशस तन पुशरावान छुख  
 अनहॉर्य् सदम अँज़रावान छुख  
 मे छु अँगनु क्वंडस दूदु नाग वुज़ान

क्याह ताम छि अँदरी कतुरावान  
 आकाश छु दरती नालु रटान  
 व्वंदु लँहरन थनु याकूत प्यवान  
 स्वंदु ब्रारि छु गथ अखताबु करान  
 कावेरी स्वनु मूरँच्च अंदर  
 व्यथु वानिच रुमु सुसराय वुछान  
 च्यतु चंदन बागस कॉली नाग  
 हँत्त्य हून्य छु रोटमुत वति पकवुन  
 फँट्य होवर्यव होवर्यव बोनि ह्यडर  
 खँत्त्य गाशिर्य रंगु सँर्य असमानस  
 बेयि द्राव कोलम्बस वथ छारान  
 बेयि कालीदासन ओबरस वोन  
 ह्योत सती सरन वाहराव करुन  
 वापस तँम्य ह्योत विजि वाव करुन  
 पनु पोंपरि सोरुय दुनिया चोन  
 व्वलु बोज़ कत्युक छुय बोजुन पय  
 पख नर्तकियन सुत्त्य ज्ञान करय  
 जज़बन हुँद्य थँद्य असमान गरय  
 शिलु तुलतम, तुलु त्यंगल छिम लॉर्य  
 व्यतरॉविम तनि ज़िलु ज़िलु कॉत्याह  
 गुमु श्रान छि गॉमुत्य् आरु पलन

★ ★ ★ ★ ★

## तिम द्वह

तिम द्वह ऑस्व् शायद खाबुय खाब  
 येलि नावन, डूंगन, सॉलन, मॉलन  
 दोरान लारान ऑस्व्  
 दिथ तार सुली स्वनु सॉव्य डलस  
 व्यथु बँठ्य पँक्य पँक्य कुनि यारुबलस  
 मनु एहसासुक्य समसार वुज़ान  
 रूज़िथ हिव्य मंज़र सॉर्य गछान  
 नज़रन ठरि कांह मा ओस अज़ाब  
 तिम द्वह ऑस्व् शायद खाबुय खाब

क्वलु आरु वनां क्वसुतामथ कथ  
 मेठेमुन्न लय पोंपुर्य अतुगथ  
 कुनि जंगुल्य जोये त्रेशा चथ  
 नबु तारय ओस च्चटान रबाब  
 तिम द्वह ऑस्व् शायद खाबुय खाब

द्वह मीठ्य तु पानस तामुय ओस  
 स्वरमँल्य संद्या स्वरनय बा होश  
 नखु नखु ओस शूबान पनुनुय ओश  
 दस नोजुक मस तेलान रातस  
 र्वपु लॉकि बिहिथ वुज़मलु गाशस  
 वोथ जोदगरा डल आबस मंज़  
 संतूर वज़ान गिर्दाबस मंज़  
 तिम ऑस्व् बदल, बदलय आदाब  
 तिम द्वह ऑस्व् शायद खाबुय खाब

डल सोरुय च़ामुत श्रोकन्यन अज़  
 अँहरम तस च़ापुनि आमुत अज़



पनु पनु आदम कति रोज्यस ताब  
तिम द्वह ऑस्व् शायद खाबुय खाब

★ ★ ★ ★ ★

## पनु वॅथुर

विजि वावन ख्वशवुन्य् तूफानन  
 गटु कारुक्य् मारिक्य् अथु ह्यथ कुत्य्  
 रंगु रादन पादन नाल वोलुन  
 दूद चॉविथ गव खूनखार स्यठाह  
 कुत्य् तेहर्यन अदु वथुवार कोरुन  
 वॅथ्य् वॅथुर तु खॅत्य् आकाशस कुत्य्  
 कॅह कतरिन कॅचन बुथ नोहवुन  
 कॅह द्राय तु छॅकरनु आय तमाम  
 लॅग्य् लारुक्य् दार तु दारुक्य् लार  
 कनि माँदानन सेकि सहरावन  
 अडु मॉर्य गछान, पोञ्ज रूद्य पकान  
 पनु वॅथुर स्यठाह ऑविल्य् नोजुक  
 शाहज़ादु तु शेहजारुक्य् कौतिब  
 कनि कतर्यन लॅग्य्, ततु पॅतर्यन लॅग्य्  
 कॅचन गव हेह तॅथ्य् सुत्य् गॅलिय  
 कॅह वुनि तॅथ्य् गिर्दाबस अंदर  
 कॅह वावु गल्यन मोहताज सपुन्य्  
 शाह ऑस्य् तु वय ताराज सपुन्य्  
 कॅह आय म्वचान, कॅह आय छ्वकान  
 कॅह आय च्रमान, कॅह रूद्य शमान  
 कॅह दॅजमुच्र तन ह्यथ शहर शहर  
 नफसुक्य् अमारन दारस खौर्य  
 कॅह म्वकलॉविख अँछ गाशु निशे  
 थँद्य रॉयिल ठासान ठासान वॅथ्य्  
 कॅह द्राय तु वापस आय नु कॅह  
 कॅह दॅरियावन अंदर गॅय रॉस्य्  
 कॅचन कोर कॅम्य् जॉच्रव आहार  
 कुत्यन वॅर्य दाद्यव जिगरस ऑल्य्

पोज़ पथ कुन यिम केंह बाकय रूद्य  
तिम अज़ ति पकान कलु थोद थॉविथ  
गलि ज़्यव पोज़ गॉमुन्न शेर दिलन  
छी अज़ ति द्वहय सोचान रोज़ान  
कति आय तु मँज़िल कुस सोनुय

पनु वँथरव रोस कुल नंगय अज़  
हे, वँथुर वँथुर बेयि सौबुरावव  
पतु प्रारव सौतस बालस तल

★ ★ ★ ★ ★

## नज़्म

नारु सँदरा बु छुस  
 बस अलावय अलाव  
 नारुची ऑडरन  
 आसि म्यॉनिस रूहस  
 नारु कंग ह्यू दज़ान  
 अज़लु प्यठु आस बुय  
 नारु तँत्य् यिम मनस  
 तिम वुछम कुस सना ?

तेज़ मनकल वछस मंज़  
 तु अँदरी सुसर  
 तापु क्रायन अंदर  
 नारु दँज़ म्यॉन्त्य् च्रम  
 नारु अँद्य पँक्य् दज़ान  
 त्यंबुर बदनस व्वथान  
 दँज़ फुलय येलि मे ह्योछ  
 ख्वखजि कँर्य कँर्य पकुन

पँट्य वतन तुरि कँड्य  
 आसमां गव सियाह  
 वुज़मलव ह्योत ग्रजुन  
 दुह्य लम्बख गँय खसान  
 शबनमस सूर गव  
 सूर्य गँय हे वनय कुत्य्  
 अनहॉर्य वन

कुत्य् मखमँत्य् शहर  
 कुत्य् स्वंदर महल

कुत्पु मंज़र अछिव्य  
 कुत्पु मखर्मैल्य जहां  
 समयि कायायि मंज़  
 खाक दामान सपुन्य  
 नारु बुज़्पु गॅय वनय कुत्पु  
 रुत्पु बोस्तान

नफरतुक नार मा आव छेवरावनय  
 आदमस वैथ्य तुफर  
 मॉसमन होल गव  
 कुत्पु आशायि कुल्य  
 कुत्पु बाज़र बैरिथ  
 कुत्पु गल गोश  
 कॉत्या सुबह मॉर्य मँद्य  
 नज़रि आतश सपुद्य

मारु वातल तु दिल तंग युथुय  
 कुन्य सपुन्य  
 खँन्न वुनल तिछ ज़ि  
 आलम यि सौरुय वोलुन  
 नार आल्यन द्युतुख  
 दुनियिहुच कांह ति क्वल  
 कांह ति व्यद हेच नु छेवरिथ यि नार  
 गव अमी नारु  
 तहज़ीबुकुय बुथ सियाह  
 ओस कॅह यी मोदुर  
 ज़हरु छ्वकुनोव ती  
 यक कलम ज़ोल, दोद  
 खत, पॅत्र, लोलु हँत्य ऑस्य कॅह  
 तिम नियख

छिम खँनिथ थॉव्यमुत्  
 दोजि एहसासुचे  
 नारु छठ गँछ नु वातुन्यु तिमन ताम ज़ांह

रूद च्यथ म्योन  
 शीतल हवा फाँफलान  
 युथ यि दम रोज़ि काँयिम  
 दमस ताम येलिय  
 नेरि नोन आदमाह  
 त्रावि खत मीलि हुंद  
 नारु खावल च़िह्यन  
 चापि शँशतुर  
 तु सग त्रावि वँस्तुर वनस  
 दँद्यमुत्यन, च़ैल्यमुत्यन  
 लायि आलव च़ोपोर  
 “ज़िंदु सपनिव” वन्यख  
 हे कँरिथ नालुमँत्यु  
 नारु मोहल्यन वँथिव  
 ह्यथ मशाँल्या अथन क्यथ  
 कँरिव रक्स त्युथ  
 युथ यि ज़ालामुखी  
 म्योन दम फुट्य वजूद  
 चाँग्यु गाशस अंदर  
 बुथ पनुन परज़ुनिथ  
 खाबु मंज़ु व्वठ कँडिथ  
 सपनि बेदार  
 पँज़ पज़रुनथ प्रावि नँन्यु  
 युथ ज़ि शेहजार  
 मुश्कावि कुल आलमस

★ ★ ★ ★ ★

## गज़ल

व्वथ च्चु होशिक्य् पोश अज़ पूजायि लाग  
रंगु सॅर्य रख रोशिमच्चि रादायि लाग

हायि गॉमुत्य् कायनातुक्य् जोदगर  
मायि हुंघ चांदे वरक कायायि लाग

वुठ सुविथ ऑखुर बेहख कोत ताम वन  
पानु जुवुनुक नार यथ च्यंतायि लाग

खाब वुछ पोज़ खाब गॅय खाबुय मगर  
काकज़ी पोशन च्चु मोमुल मायि लाग

बालु पॅत्य् प्रागाश नोन मा द्राव वुछ  
शूच्च्य् कॅह फुट्चमुत्य् अछर आशायि लाग

सूरु मंज़ु सॉरिथ अनुन स्वरगुक वजूद  
वारु वति छॅकरोवमुत सरमायि लाग

अंदरु कनि हॅद्रेर ह्यू लोगमुत दिलस  
व्वंदु वुशनेरुक्य पलव कॅह बायि लाग

कायनातुच गथ ज़हुय छनु पथ पकान  
स्वनहॅरी पर तापु दज़ि मच्चि छायि लाग

शाफ वथि पछ थव मनस अंदर च्चु पूर  
सायि मजबूरो च्चु तापय क्रायि लाग

★ ★ ★ ★ ★

## गज़ल

चु शूब म्यॉन्य छख बु इश्तिहार चोन  
फुलय छे पोशि मॅन्न यि लोलु नार चोन

यरादु छी ज़बर खयाल छी अछिव्य  
ज़हुन्य नु यथ करार सुय करार चोन

मॅछिज नज़र यि चॉन्य सहर सहर पडाव  
कमन अंदर वनुम करय शुमार चोन

खज़ानु शोकु हॅत्य मुन्नर तु जल हना  
वॅथुर छुसय कुनुय मगर बहार चोन

कथन चु पानु सन लबख चु लाल कुत्य  
वथा चु छख शिहिज बु एतिबार चोन

ठॅहर चु बालु कोल्यु सेक्युल ति म्योन वुछ  
अगर करख चु पछ बु सब्ज़ ज़ार चोन

हिसाब थाव व्वन्य मॅ कर छ्वकन शुमार  
चु गाश बे बहा बु गाशदार चोन

वतन छि नेज़ु थॅद्य हतस छि कथ कुनी  
चु पछ करख अगर बु म्वख्तु हार चोन

मे चानि लोलु कुय सहारु छुम स्यठाह  
चु म्यॉन्य छख व्वमेद बु प्रानुवार चोन

★ ★ ★ ★ ★



## गज़ल

छर्यर ह्यू अज़ छु बासान नव बहारस  
नज़ान आलव छि बेकस यथ शहारस

छु च़ोलमुत च़ूरि कुस ताम दूर शायद  
मँशिथ गोमुत छु मेछर नागु हारस

मुश्क न्यूमुत मुहिथ छुख अज़ ज़मानस  
तवय शायद छु खुर यथ गाटुजारस

स्यठाह बदलोव नामन हुंद तरह मे  
वुठन माँथुर सँनिथ गँयि ताजदारस  
अमारुक्य वल, तु चँश्मन हुंद्य समन बल  
दिलुक्य अछिवल नियम कुस डॉल्य यारस

वरक फिर्य फिर्य अछर तँस्य निश छि लारान  
खसान मजबूर तस मा कँह चिकारस

★ ★ ★ ★ ★

## गज़ल

कालु नबस कुस तुलिहे तिख  
वुज़मलि लीछिस स्वनहॅर्य रिख

च्यत् सॅर्य म्वख्तु बुबर व्वतल्याय  
हुक तुज शोकु हच्चे अकि टिख

डोलि अंदर महारेन्य पेयि याद  
यारबलस प्यठ वेसि हुंज़ चिख

बहरामन द्युत मोतस नाद  
पां चादरि गॅयि लोलच निख

दिवदारव कोर पॉज़न साल  
कुठर्यन मून्य च्चिथुर खॉरिख  
अज़ लॅज दिलु दुबरायन ज़ीर  
मजबूरस निश दॅल्य वॅहरिख

★ ★ ★ ★ ★

## गज़ल

वोत प्रारान चानि बापथ अख ज़माना हय मँच्ची  
जानि कुस कस कूत लीखिथ आबु दाना हय मँच्ची

छुस पकान तलवारि दारे पान छुम पनुनुय गवाह  
वात तम दादस हना, छख ना च़ु दाना हय मँच्ची

जिंदगी ब्रँज्यन, ब्रमन अंदर पकान खामोश पॉठ्य  
पोज़ अँदुर्य तेलान जज़बन हुंद तुफाना हय मँच्ची

टाठुन्यारुक्य नगमु छी चान्यन इशारन मंज़ वुज़ान  
चानि हुस्नुक गोछ मे पोशुन आसमाना हय मँच्ची

राज़ कॉत्याह छिम खँटिथ सीनस अंदर मोलूम छुय  
चानि बर तँल्य म्योन पक़वुन कारवाना हय मँच्ची

छख यिवान येलि पूर्य किन्य अखताबु छुस डेशान बो  
म्यानि बापथ जिंदु रोज़ुन जेल खाना हय मँच्ची

छुस मनस चॉनिस अंदर अख नोव ज़न्म शायद लबान  
दूर छुस मजबूर प्योमुत राज़दाना हय मँच्ची

★ ★ ★ ★ ★

## गज़ल

चानि बापथ सूर्यमुत्य् चिह छुस सरान  
रूठ्यमुत्य् रंबुवन्य् वचन फिर्य फिर्य परान

ओल युस येर्योव यागर पॅछनि न्युव  
नारु सहरावस अंदर दूह छुस बरान

सलतनत चॉनी छि बॅड अंद छुस न तार  
म्यानि म्वखु कवु कौद खानय छख गरान

सौंथ छी स्वरमॅल्य् अॅछन अंदर खॅटिथ  
सानि वेरे हर्दकुय पन छख हरान

लाग वर्दन, मल अॅतुर मुश्काव तन  
शर्मि हुंद पौथुर कवो अज़ छुख करान

डाल दिख यथ दॅदवनस फचलि म्वख्तु डल  
साफ कथ वनु हा तु तथ मा छुस दरान

साज़ तुल, गुमनाव वुठ लय आछु नाव  
अज़ बु छुस संगीतु सॅद्रव मँज़्य तरान

★ ★ ★ ★ ★

## दुख

स्यठाह कोर ज़ोर अखताबन मगर थोक  
 सियाह ओबरन नबस वाहरोव दामन  
 जेर्यव वोथ रूद दरती सीनु दोरुस  
 फम्बुक्य अंबार खँत्यमुत्य बालु मालन

कयामथ वँछ मगर ठँहरेयि नागाह  
 बँठिस ओस जोशि फोलमुत पोशि बागाह  
 हवा मुशक्यल वुछुन बस ज़ोर म्वकल्योस  
 ब्रगाह छोट बोनि वँथरस प्यठ बिहिथ ओस

व्वजुल लालाह छु ज़ोतान ज़ून गाशस  
 छे लॉला ऑल हिश प्रारान रातस  
 कनन हू हू गछान क्याह ताम गांगल  
 दलीला छुस वनान पॉज़ा कनस तल

शिकारे नम छु गिर्दाबस अंदर खम  
 व्वखुर लोगमुत चँकिस दँरियाव बरहम  
 मन्नर मँस्ती तु मेछर ज़िंदगी हुंद  
 छु पारुद थामु गोमुत जोतले जम

महासीरा सरस मंज़ दिल छु लूबान  
 तुलिथ छाला छि हावान योसमुन्य पान  
 बँठिस प्यठ जानुवारा माय लॉगिथ  
 ख्यवान अफसूस पोज़ कँह छुस नु फोरान

शिशुर कठ कोश तु फवलुवुन्य तुर रातस  
 यिथिस मंज़ नारु जोशा थावि युस मस  
 ससर लागि मानि अँदरी पॉन्य पानय

मॅतिस मागस ति हारुक्य् ब्राँत्य् गछनस

हेरा दाँतुव छे पोरस जोरि मारान  
पद्यन हुंद्य आख कस तामथ छि छारान  
मच्चर वोथ दारि प्यठ येलि ख्वश हवावस  
तेली कॅर ग्राव बबरे अर्गवानस

छु काँलीना तु रंग छुस ज़ाफरॉनी  
रिकाँब्या गछ कॅडिथ अँथ्य् प्यठ छि खॉली  
शमा दूरी दज़ान चूरी छु गहलिस  
तु सोदागर मंगान क्याह ताम शिहलिस

छु सँन्य् चूरा खँटिथ अथि काँसि मा आव  
फरान छुय सारिनय मशकूक छुस नाव  
ब्रंज़िस सातस खँसिथ तख्तस करान राज  
अत्यन शाहो गदा सॉरी छि मोहताज

किताबा शूबुन्य् नोन छुस नु तँहरीर  
इशारन मंज़ लेखिथ छिन थॉव्युमत्य् सीर  
वरक फिर्य फिर्य छु योदवय कॅह नु मेलान  
गछान देवानु काँत्याह, यूत छु ताँसीर

गँमुत्य् हॉरिथ छि अति काँत्याह कलंदर  
रेष्यन सादन तु दरवेशन फुटान पर  
सँरिथ सूँचिथ कलामस कॅर्यज़ि वखनय  
योहय छा ज़िंदगी हुंद सोर हर तर ?

सियाह पोशाह मगर वुछ लूबुन क्याह  
हकारत क्याज़ि कॅरथस छुस खता क्या  
रंगन वॉलिस छि रंगन हुंज़ महारथ

पलस अंदर छु व्वपदावान दुर हा

द्वहस यथ कायि कुनि मा स्वख छु सातस  
 छु सोपनन हुंद जगथ वोलान रातस  
 च्यतस मंज हंगतु मंगुच च्चक्रु मांडय  
 स्यठाह मुश्किल छु वातुन अथ हिसाबस  
 करख परखाय चीजन आसि योद ज्ञान  
 स्यठाह मुश्किल छु परखावुन यि इनसान  
 “करान पोशे चमन वाँसन यबादथ  
 अदय कांह नजरि वोला पाँदु सपदान”

रिकाबस मंज छु खवर रखशस दिचुख ज़ीर  
 दपख ठँहरुन! छु मा तथ कांह ति तदबीर  
 सवारस ज़ीर लँज रुम राठ सौर्यस  
 प्रछा तिछ यथ नु ज़ाँहिर कांह ति ताँबीर

म कर जल्दी च्चु, बँल्य् रावी पनुन वक  
 ज़मानस छुय बुकुर गोमुत स्यठाह सख  
 सौबर फँल्य् प्वख्तु पनुनिस होशि हारस  
 वँसिथ युप छा लगान पतु तौर तारस

मे बेयि सुय बोनि बागन हुंद हवा गोछ  
 गरन अंदर शुर्यन हुंदा रुत सदा गोछ  
 अमा कँम्य् स्वर्गु दारस शाफ द्युतमुत  
 हँकीमा नोव तु छ्वख बलनुक दवा गोछ

छे जाया तंग च्चँसिथ आमुत छु दुनिया  
 अजब शोरा तु कथ बोज्ञान छुनु कांह  
 यिथिस अंदर छ्वपय करुहाव ताबा  
 छु वक वाँतिथ पवलान पानय ग्वलाबा

स्यटाह मुश्किल अचुन अँदुर्य छु अंदर  
 मंगुन पज़ि ती यि सार्यन रोज़ि बेहतर  
 लये सुती यिवान आदम लये छुय  
 हँसीना लागि युस शूबान ज़ेवर

खबर बूजुम ज़ि अख दूह वॉसि गव कम  
 छु दूहदिश पोशिनावुन साज़े महकम  
 अथन मंज़ रास पोज़ लमनस खबर कुस  
 पकान नावा तु नोन छुनु हाँज़ या हम

छे यावन थँर तु बावँच बल छु मुश्कान  
 मंगस पोशाह, दिया केंह छुम नु बासान  
 छु बेहतर दूरि दूरी नूर छावुन  
 छनन मा पोश येलि व्वथि वावु तूफान

अँछन गाशा क्वठचन होशा गँनीमथ  
 पकुन मॉलस मगर नँन्य् छय नु कांह वथ  
 छु जश्ना यथ अंदर सॉरी छि बदमस  
 कहुन्य् बोज़ान छुनु येति काँसि हुज़ कथ

छु ओर दोर आदमा बँल्य् हायि गोमुत  
 दपान करु क्या बु वक्तस ? ज़ायि गोमुत  
 कँरिथ ह्यकु कार रुत्य् पोज़ वार मा छुम  
 मकाना नोव छु अँदुर्य आवस्योमुत

छि लवु हँत्य् टूर्य् औंद पोक बारसस आव  
 पँतिम पँहरुक छु वक अँछ वारु मुच़राव  
 सुली छंदरिथ ज़ुच़न हुँद ताज लॉगिथ  
 नबस गब केंह च़ँटिथ अखताबु नोन द्राव



व्यचारन हुंघ व्वलर येलि दूँछुराँविम  
 यरादन हुंघ महल खॉरिम तु वॉलिम  
 अमारन हुंजु हमान छनु त्रेश हरगिज़  
 महाभारत मे अँदरी कुत्य् हॉरिम

गँछूम जाया वनस अंदर स्यठाह दूर  
 मतेमुत्य् शहरकिस शहरस छि सँन्य् चूर  
 सिराह कुस ताम थॉविथ डंजि वथ कथ  
 कथन मंज़ शोरु बॅर्य बॅर्य ज्यव गँमुन्न लूर

अथस वुछतम रुखन क्याह छुम मे तकसीर  
 बु गोमुत हंगतु मंगय क्याज़ि छुस गीर  
 बु योदवय गाश सँदियन हुंद रछान आस  
 अमा व्योख्तुय बनोवुख म्योन तसवीर

★ ★ ★ ★ ★

## नगमु - १

स्वर्गय लूकुच सब्जय डॉली  
 पतु वथ चुय छख बख्तावार  
 लछु बॅद्य अथु छी हय स्वंजॉली  
 पतु वथ चुय छख बख्तावार

हनि हनि रीशिम तनि छुय नॉली  
 जायि जायि लॉगिथ छख दरबार  
 र्वपु वॉनिस मंज मस बंगॉली  
 पतु वथ चुय छख बख्तावार

हतु बॅद्य कूलर त्रॉविथ नॉली  
 गथ क्याह मारान पॉट्य अंबार  
 ताल छय आकॉश, मूल पातॉली  
 पतु वथ चुय छख बख्तावार

वति वति सनिरन, थज़रन, नारन  
 सनु वुन्य् छखय बोज़ुनावान तार  
 दूर छख अलुरान पूर शाहमॉली  
 पतु वथ चुय छख बख्तावार

केसॅर्य जामु चॉन्य् नारु मशॉली  
 तिहरिस बोलान जानावार  
 चोनुय स्नेह असि पूशिन मॉली  
 पतु वथ चुय छख बख्तावार

जामन खारान चॉन्य् अंजॉली  
 पंजरन मंज चॉनी आसार  
 मजबूर नारु मंजु रछतन ऑली  
 पतु वथ चुय छख बख्तावार

★ ★ ★ ★ ★

## नगमु - २

बुधि प्यठु थोद तुल नोजुक नॅरिये  
 व्वलु रूदु जॅरिये कर ठॅहराव  
 कॅम्पु गॅरिमुत्पु छी यिम र्वनि हॅरिये  
 व्वलु रूदु जॅरिये कर ठॅहराव

तनि छी लॉगिथ अबरक वॅरिये  
 सीमाब सॅरिये अस्तय पख  
 वुजमलु वनवान रोव कॅर्य कॅरिये  
 व्वलु रूदु जॅरिये कर ठॅहराव

नपु नपु करवुन्पु हय नन्नन गॅरिये  
 च्चंदन सॅरिये आयख मा  
 हरम्बखु च्चजिखय होकर सॅरिये  
 व्वलु रूदु जॅरिये कर ठॅहराव

कॉलास बालन वोलास वॅलिये  
 पेठ्य महाबॅलिये लॉयिथ छाल  
 अमृतु थॉविथ सर बॅर्य बॅरिये  
 व्वलु रूदु जॅरिये कर ठॅहराव

रोशि रोशि आयख कमि सॅदुरिये  
 वरनस सुत्पु हम सॅरिये छय  
 पानस चॉनिस ऑविल्पु बॅरिये  
 व्वलु रूदु जॅरिये कर ठॅहराव

आकॉश आयखय म्वख्तय लॅरिये  
 पुरखाश खानु बदोश तुल  
 स्वरगुच शेछ वन बागु बॅरिये

व्वलु रूदु जॅरिये कर ठॅहराव

आशि सुत्तु छलनय पॅद्य कॅशिर्यये  
ग्रॅशमय वॅरिये वातख ना  
मजबूर प्रारान छुय लोलॅरिये  
व्वलु रूदु जॅरिये कर ठॅहराव

★ ★ ★ ★ ★

## नगमु - ३

तन छय न्यथुनँन्य दस कलु वॉली  
 स्वंदर मॉली यिख ना यूर्य  
 शेहजार चॉनिस बदनस नॉली  
 स्वंदर मॉली यिख ना यूर्य  
 हये वावु मॉली यिख ना युर्य

वेर नागु ज़ायख पेठ्य पांच्रॉली  
 फेरान कवु बॉल्य् बॉली छख  
 असि कुन अज़ यिख ना यँन्न कॉली  
 स्वंदर मॉली यिख ना यूर्य  
 हये वावु मॉली यिख ना युर्य

दर्दय बॉथा तुल पोशि हॉरी  
 थेपि थेपि छारान सॉरी छी  
 सॉनिस स्वनुसुय गँयि सरतॉली  
 स्वंदर मॉली यिख ना यूर्य  
 हये वावु मॉली यिख ना युर्य

स्नेह छुम चोनुय वेह छुस ज़ालान  
 पालान रोज़य चॉनी द्वह  
 “मजबूरा” छुस ला वुबॉली  
 स्वंदर मॉली यिख ना यूर्य  
 हये वावु मॉली यिख ना युर्य

★ ★ ★ ★ ★

## नगमु - ४

रुवपु की जालार शीशय लॅरिये  
 पां च़ादॅरिये शूबान छख  
 ज़ॅरिये मस छुय गुलदफ पॅरिये  
 पां च़ादॅरिये शूबान छख

तन छय ऑविज ज़न ऑनु पॅटिये  
 दामानु थाव वॅट्य् वॅटिये च़ु  
 खामोश वुठ चॉन्य साज़दॅरिये  
 पां च़ादॅरिये शूबान छख

नालन मंज़ चोन मातामालय  
 ज़ालय कॅम्य् सन लॉजिख वन  
 सुत्त्य सुत्त्य कौत्याह छिय सालॅरिये  
 पां च़ादॅरिये शूबान छख

पूज़ा शूबी श्रूचिस पानस  
 च़े तु जानानस फर्क्य क्याह  
 “मजबूर” थावी प्यालु बॅर्य बॅरिये  
 पां च़ादॅरिये शूबान छख

★ ★ ★ ★ ★

## नगमु - ५

म्वख्तु म्वलवान मानसबॅलिये  
शाह कोलिये लोल हय आव  
सुलि द्रायख यार्यव तॅलिये  
शाह कोलिये लोल हय आव

चानि सगु सूत्य् कोह तु वन फोलिये  
कुत्य् बेमार बॅलिथुय द्राय  
जायि जायि खॅत्य् कुल्य् अॅल्य् अॅलिये  
शाह कोलिये लोल हय आव

नागु प्वखर्यन चोनुय स्नेह छुय  
गासु तुलिनुय चोनुय नेह  
बोनि छायव वरदन वॅलिये  
शाह कोलिये लोल हय आव

दूरि ओंद पोख आव व्वलसनसुय  
तीर्य् खेल्य् खॅत्य् वॅस्तुर वनसुय  
राज़् होंज़् तॅर्य् सॅनिजे डलिये  
शाह कोलिये लोल हय आव

सिरयि द्रामुत र्वय चोन वुछने  
चोन मर्तब पानय रछने  
हॅल्य् हॅल्य् छी गॅड्यमुत्य् हॅल्यये  
शाह कोलिये लोल हय आव

पानु मजबूर चानि शीनु वाने  
लोलु मान्ये मुच्चरावान  
दानि दाने र्वफ हेयि मॅलिये  
शाह कोलिये लोल हय आव

★ ★ ★ ★ ★

## नगमु - ६

यँदराज़ुन्य् र्वनि माहरेनिये  
सावेनिये यावन छाव  
नेर राशस फेर गतु रेनिये  
सावेनिये यावन छाव

सीटु-दँरियोय पश ज़रकॉर्य  
आगये छी कुत्पु बापॉर्य  
पर्दु थोद तुल मुग्रराव तँनिये  
सावेनिये यावन छाव

नावि नमुकी तीर छख लायान  
खूर्य आलवान संतूर वायान  
चमु खमु पख हय रम्बु रेनिये  
सावेनिये यावन छाव

नेर सॉलस फेर तेल बँलिये  
वीरि छा़यव तुलिये नीर  
अथु मुस्टी चंदु छी छँनिये  
सावेनिये यावन छाव

सालु मतिनुय छख तम्बुलावान  
होशि डालान नावि छख वालान  
वावु गलिनुय छख कुन्य् जँनिये  
सावेनिये यावन छाव

पानु पेठ्य पख समसॉर्य सँद्रस  
यिनु अँदरी दामानय  
गाह कँन्य् छख गाहे थँनिये



सावेनिये यावन छाव

रादु रादय पॅक्यज़्म वुछिथुय  
वादु ओसुस गोस मा मॅशिथुय  
पानु मजबूर दियिहस वॅन्ये  
सावेनिये यावन छाव

★ ★ ★ ★ ★

---

---

**Source: 'tyól' by Arjan Dev Majboor. Year of publication: 1995**  
Transformed into Standardised Devanagari-Kashmiri by  
**M.K.Raina.**  
Work completed on 21.02.2005.

---

---